

大乘寶要義論卷第一

第二同卷

星六

宋西天三藏新譯大慈鴻臚卿傳梵大師法護等奉 詔譯

歸命十方無邊際 所住一切世界中

過未現在諸如來 菩薩聲聞緣覺等

智者當知人身難得於剎那間成諸勝行亦

復爲難若於此中不起思惟作利益事此生

虛來云何能於如來清淨言教發勤勇心領

納聽受此有二事謂人身難得正法難聞值

佛出世復甚爲難問此中以何而爲印證值

佛甚難答無數經中皆作是說斯爲定量且

永樂北藏

大乘寶要義論

第一二六冊

依妙法蓮華經云佛言諸苾芻如來應供正等正覺經於百千俱胝那庾多劫如是等曠遠世時或有或無如來出世斯爲甚難如優曇華時一現爾決定王經云佛言阿難諸佛出世彼優曇華俱時而現其華如金有淨妙光開敷異香徧由旬內是華光明能破冥暗能令念者即得清淨能息病苦能作明照能去惡香能施妙香彼香能息四界增損其華亦非隨轉輪王徧處皆出唯金輪王乃可應現況復破戒諸有情類唯佛出世是華俱出

此中云何能知彼優曇華於曠遠時或有或無如有緣起中說無熱惱大池北面有山名五峯而彼山上有優曇華林若佛世尊從兜率天宮沒降生人間入母胎時彼優曇華而方含藥若佛世尊出母胎時是華增長有開敷相若佛世尊成阿耨多羅三藐三菩提果時彼優曇華開敷茂盛若佛世尊棄捨壽命及緣行時是華萎瘁若佛世尊入涅槃時是華枝葉及以華果皆悉凋落其華分量大若車輪覺智方廣經云大名稱仙王謂諸仙衆

言諸仁者若菩薩暫時得值如來出世說法化利是即相應華嚴經云於俱胝劫中值佛出世聽受正法尊重信奉此真實見甚爲難得賢劫經云此賢劫後六十五劫無佛出世其後有劫號大名稱彼一劫中有十千佛出現於世大名稱劫後八千劫無佛出世其後有劫號曰星喻彼一劫中有八十千佛出現於世星喻劫後經三百劫無佛出世其後有劫名功德莊嚴彼一劫中有八萬四千佛出現於世此中問言云何能知人身難得答

星六

諸契經中皆作是說如雜阿舍經云佛言諸苾芻^三如大地流水充滿有人取木開一孔穴置於水中是木輕浮隨風飄流東風西向西風東向南北所吹亦復如是有一眼龜居其水內壽命無數百歲凡經一百歲自水一浮投木孔中諸苾芻於汝意云何彼一眼龜如是壽極長遠百歲一浮可能得值浮木孔耶諸苾芻言不也世尊佛言諸苾芻值佛出世說法化度覺了正道得至涅槃亦復如是斯極爲難或得人身時分具足又復爲難此中

問言云何能知時分具足而難得耶答諸契經中作如是說如增一阿舍經云佛言諸苾芻有八種難不知時人不應修梵行何等爲八若佛出世時宣說法要化度有情使至涅槃而一類有情在地獄中此爲第一修梵行者時分之難若佛出世時宣說法要化度有情使至涅槃而一類有情在畜生中此爲第二修梵行者時分之難若佛出世時宣說法要化度有情使至涅槃而一類有情在餓鬼中此爲第三修梵行者時分之難佛出世時

宣說法要化度有情使至涅槃而一類有情在長壽天此爲第四修梵行者時分之難若佛出世時宣說法要化度有情使至涅槃而一類有情在於邊惡患害之處此爲第五修梵行者時分之難若佛出世時宣說法要化度有情使至涅槃而一類有情雖生中國或聾或瘡根不完具善說惡說不知其義此爲第六修梵行者時分之難若佛出世時宣說法要化度有情使至涅槃而一類有情生於中國不聾不瘡六根完具善說惡說而悉能知又復正見無顛倒計執謂有施有利乃至有阿羅漢取證聖果然佛不出世不說法要此爲第八修梵行者時分之難諸中國不聾不瘡六根完具善說惡說而悉能

知然起邪見顛倒計執謂無施無利亦無事火無善作惡作諸業果報無此世無他世無父無母無世間沙門婆羅門無正趣正道無阿羅漢智解於此世他世以自通力而證聖果此爲第七修梵行者時分之難或復一類有情生於中國不聾不瘡六根完具善說惡說而悉能知又復正見無顛倒計執謂有施有利乃至有阿羅漢取證聖果然佛不出世不說法要此爲第八修梵行者時分之難諸苾芻當知有一種時分和合應修梵行謂佛

出世宣說法要初善中善後善文義深遠純一無雜具足清白梵行之相而一類有情生於中國不聾不痘六根完具善說惡說而悉能知正見具足不起顛倒計執謂有施有利亦有事火有善作惡作諸業果報有此世有他世有父有母有世間沙門婆羅門有正趣正道有阿羅漢智解於此世他世以自通力而證聖果是爲一種時分和合大集經月藏品云諸仁者時分和合如應時香樹極爲難得

此中應問彼作是說得人身者云何能得清淨平等清淨所說答有十種功德若能圓滿彼得人身清淨平等何等爲十如超越下族經云一者若善男子善女人內發菩提心已即生淨信二者廣多清淨欲見聖賢三者樂聞正法四者不生慳嫉普行大施五者端身繫念樂涅槃道六者以無礙心善心廣施七者信有諸業及諸業報八者不起分別九者無求無疑亦無染慧十者不壞善惡業果如是十種若了知已於此命緣諸惡莫作此中

應問何名爲信答信者謂順向聖賢諸惡莫作如破染慧經云諸善法中信爲先導是中信者何義謂信順義此能具足如來無障礙智而能宣說難見難知甚深正法永斷愛纏謂無眼無耳鼻舌身意無耳鼻舌身意滅無住非無住無意樂非無意樂具六十種音聲文句次第語業清淨潔白其身極淨其心現種種色相而佛如來無所不知無所不見無不成證無不覺了如來以清淨眼及如來普眼永斷過失遠離貪愛破諸癡眠過

星六

於肉眼而能觀照甚深頂相宣說無上第一義諦一切佛法雖復分別如是佛法而不謗緣起此名爲信信力入印法門經云佛言妙吉祥何名信力謂於一切佛法現前印順信解無疑亦無異求決定實信業及業報信心無雜於空無相無願所作諸行及一切法皆生淨信謂布施有布施果持戒持戒果忍辱忍辱果精進精進果禪定禪定果智慧智慧果彼如是說是清淨相於大乘勝解中能生淨信此說名爲信力若後覺了諸著是名信

根若根若力總說名信又復此中何名信力
信謂印順能信他聲云何修菩薩者信他聲
耶所謂聞他教示發菩提心修菩薩行菩薩
依止波羅蜜多善巧方便及四攝法一切佛
法菩薩法等聲從他聞已極生淨信此說名

爲信力菩薩藏經云佛言舍利子此修菩薩
行者內發菩提心已即生淨信廣多清淨欲
見聖賢樂聞正法決定信有諸業及業果報
斷十不善業修十善業信有沙門婆羅門及
正趣正道而復多聞所聞相應心意和合超

越疑惑不受後有於諸佛菩薩及聲聞等真
善知識常所親近起愛重心信彼善知識所
說諸業及業果報知其器已如應爲說甚深
言論謂空無相無願無行無生無起之論無
我無人無有情無壽者之論及緣生論是諸
言論聞已無疑亦復無執隨入一切法蘊處
星六
界等悉應無著信一切法自性皆空以佛智
推求純一不放逸何名不放逸謂若諸根起
散亂時應自心調伏他心隨護月光菩薩經
云若諸有情於三寶中起淨信心而實難得

譬彼如意珠寶求得亦難入如來功德智不思議境界經云聖除蓋障菩薩白妙吉祥菩薩言有五種法諸菩薩摩訶薩當生勝解若此若彼阿僧祇最勝功德而悉獲得何等爲五一者一切法空二者一切法無對治三者一切法無生四者一切法無滅五者一切法不可記說如是五種當生勝解如闍浮提地過微塵等數諸威儀道及作用處如來悉無發悟亦無分別然隨衆生意若時非時一切常轉諸菩薩摩訶薩於此當生勝解星賀

驥那你緣起經云世尊釋迦牟尼如來爲化度有情作利益故於毘伽沙數劫中歷修諸行現成正覺諸菩薩摩訶薩於此應生信解又世尊釋迦牟尼如來於燃燈佛所得受記別於其中間歷修勝行偏入諸佛境界經無邊際劫乃至于今現成正覺於此應生信解又世尊釋迦牟尼如來見殺釋種因緣爲化度有情作利益故經無邊際劫歷修勝行現成正覺於此應生信解是故當知一切有情若發菩提心此爲難得

問發菩提心實爲難得此復云何得發起耶
答多有經說且依華嚴經云世間有情若發
阿耨多羅三藐三菩提心實爲難得當知菩
提心如世間種子以世間一切善法悉種植
故如一切佛法境界一切惡作能盡燒故猶
如劫火一切不善法能銷壞故猶如大地一
切義能成就故如摩尼寶王一切意樂悉圓
滿故猶如賢瓶拔出生死流故如勝鉤餌一
切世間天人阿脩羅乃至一切佛法一切佛
功德皆悉稱讚彼菩提心功德故如佛塔廟

何以故此中具有諸菩薩行勝境界故又復
此菩提心出生過去未來現在一切諸佛善
男子譬如有藥名鐵金光是藥一兩能化鐵
千兩悉使成金非彼千兩鐵而能壞此一兩
聖藥發菩提心者亦復如是若能一發一切
智心微妙聖藥善根迴向智所攝受能令一
切業煩惱障悉成一切法一切智金非彼一
切業煩惱障而能染汙一切智心善男子又
如秉一燈炬入於暗室隨入空中彼百千年
積集暗暝皆悉破滅洞然明照發菩提心亦

復如是乘一切智心大光明炬入於有情心
意暗室隨入其中彼不可說百千劫已來積
集一切業煩惱障無明黑暗皆悉銷除以大
智光出生明照善男子又如大龍王頂大如意
妙寶王冠不爲他怨敢來侵怖諸菩薩摩訶薩
星六亦復如是頂菩提心及大悲心妙寶王冠不爲一切惡趣諸惡敢來侵怖又如日月
淨圓光中極所照曜是中應現所有一切金銀珍寶華鬘衣服勝妙樂具總集彼等一切所有皆不能與如意寶王等其價直發菩提

心亦復如是極盡三世一切智智法界道場
隨所照曜是中應現一切有情一切天人及
彼一切聲聞緣覺若有漏若無漏一切善根
皆不能與發菩提心自在寶王等其價直又
如牛羊之乳滿大海中若師子乳足跡之滴
墮海中時牛羊諸乳不能凝結亦不和合菩
提心亦復如是不可說百千劫積集諸業煩
惱其猶大海如來大丈夫師子發一切智心
一滴之乳墮海中時諸業煩惱永盡無餘所
有一切聲聞緣覺解脫亦不和合又如親近

勇猛之人一切怨惡不能侵害發菩提心者亦復如是若親近勇猛菩薩一切惡作之怨不能侵害又如殘缺金剛之寶雖有所損於衆寶中亦復最勝而能出過諸莊嚴具彼金剛寶名亦不殞滅普能拯濟諸有貧乏少分菩提心亦復如是其猶殘缺金剛之寶雖未圓具而亦出過一切聲聞緣覺功德莊嚴彼菩薩名亦不殞滅能濟貧乏無聖財者勝軍王問經云佛言大王善哉善哉汝能於佛法中愛樂希求如汝大王現今治化憍薩羅國

星六
利益安樂一切人民救援濟度安慰接引使歸正道而汝若能廣利一切有情令發一切智心圓滿一切佛法趣證阿耨多羅三藐三菩提道斯復大利又復大王彼祇陀林常有無數百千聖賢隱居其中生尊重想大王彼諸聖賢於正等覺有所樂欲有信有求有願有稱讚生隨喜心是諸聖賢若身語意極生信重何以故大王而彼地方有無數百佛出現無數百轉法輪無數百聖衆相續得度如是乃至無數百千俱胝那庾多碗伽沙數諸

佛出現轉正法輪化度聖衆如是彼諸聖賢皆悉發生菩提樂欲信求願等

大乘寶要義論卷第一

大乘寶要義論卷第二

宋西天三藏朝散大夫錢鴻臚少卿傳慈大師法護等奉詔譯

阿闍世王經云尊者大迦葉白妙吉祥菩薩言譬如初生師子隨生即有力勢凡所句詣或有群鹿纔聞師子之音皆悉奔竄設使大

力龍象若聞師子音時逼惱驚怖掣拽鎖縛鎖縛斷已奔馳四向山巖地穴徧求隱匿水族飛禽聞師子音亦悉驚怖妙吉祥若諸菩薩具慧力者亦復如是彼初發心菩薩纔發大菩提心即能勝過一切聲聞緣覺魔宮震動一切天魔咸生恐慄以恐慄故而悉不能安止其宮寶積經云佛言阿難於汝意云何譬若有人雙斷手足能活命不阿難答言手足雖斷其命尚活佛言阿難若或有人割裂其心是人能活命不阿難答言不也世尊佛